

晚

晴

移

詩

匯

晚晴簃詩匯卷二十四目錄

宋琬 六十首

李之芳 一首

馮溥 九首

黃機 二首

王熙 三首

郝維訥 一首

任克溥 一首

李敬 十首

宋徵輿 六首

谷應泰 三首

季開生 七首

季振宜 四首

蔣超 二首

葉封 十一首

任文華 一首

李昌垣 一首

孫宗彝 三首

張九徵 三首

杜濬 六首

馬鳴蕭 二首

劉璽 三首

繆慧遠 三首

田茂遇 二首

李旼 一首

魏學渠 三首

魏允枚 二首

王永命 一首

焦賁亨 一首

趙三麒 三首

毛蕃 二首

多宏安 一首

晚晴簃詩匯卷二十四

徐世昌

宋琬字玉叔號荔裳萊陽人順治丁亥進士戶部主事

歷官四川按察使有安雅堂集及未刻稟入蜀集

吳梅村曰玉叔天才儁上接閻父兄典訓胚胎前光
攻嗜文學盛年值際興運結綬登朝羽儀京國不可
謂不遭時也而仍見楚路用誣浮繫於理凡決月而
獲前被還官郎署出調外省其才情雋麗格合聲諧
明豔如華溫潤如璧而撫時觸事類多淒清激宕之
調又如秋隼盤空嶺猿啼夜境事既極亦復不盤於
和平庶幾平備文質而兼雅怨者王阮亭曰康熙
以來詩人無出南施北宋之右荔裳詩頗擬放翁五
言古歌行時闕杜韓之奧壬子春在京師求余定其
詩筆爲三十卷其秋與余先後入蜀明年入覲蜀亂
妻孥皆寄成都旋歿京邸
此集不知流落何地矣
詩話康熙初傳刻燕臺七子詩荔裳與愚山稱最因
有南施北宋之目悔內推之無異辭愚山詩樸秀深
厚味之彌永荔裳則融才情於騷怨音節動人託體
不同要皆原本性情力追正雅此其所以並爲大家

也安雅堂集乃在浙時所編漁洋所定全集已佚未
刻橐出於後人搜輯附入蜀詩一卷乃晚作雄健別
開一境漁洋所謂直
闕壯韓者於此見之

送別俞眉仙歸新安

古人爲吏惜折腰今人爲吏愁吹毛渭城小邑大如掌百
家殺盡十家逃俞侯年少專城居渭人始得歸田廬郭外
行春策病馬壁間退食懸枯魚一朝微中考功法拙宦違
時乃承乏妻兒驢背坐復跌擔囊但有琴書壓君家舊在
黃山曲武谿千轉清如玉拂衣長嘯山水間回首風塵眞
僕僕五柳門前菊欲黃布帆高掛蒹葭蒼歸去來兮倘相
憶隴雁飛時書數行

釣臺圖歌贈馬蘭臺山人

九嶷山人聊玩世伏波將軍之苗裔家在漢陂紫閣間孤

情獨與煙霞契彈箏叩缶本秦聲裂芟爲衣皆楚製儒冠
誤人幾半生秋風屢雪劉蕢涕長焚筆硯事丹青潑墨吮
毫稱絕藝橫皴酷似黃大癡細染還宗吳仲圭近代以來
數文沈嘉隆而後作者誰山人工意不工似匠心自出無
專師盧龍山水頗不惡韓家釣臺尤最奇一峯高入白雲
裏登樓坐見海滄湄游人欲繪每束手譬如寫照難鬚眉
一日坐我悠然堂解衣礚礚無人窺須臾圖成掛諸壁高
巖邃谷光參差瀕澹旋渦漁艇立窈冥洞口煙蘿垂主人
韓生有狂癖此臺自爾高曾貽見圖再拜悲且喜重之不
啻商尊彝便買貞珉勒山側酌酒欲告山靈知山人此別
欲何往贈汝一枝筇竹杖避世宜從麋鹿羣結廬高卧仙
人掌甯恤牀頭妻子飢要令胸中邱壑長我今持節越王

城蘭渚剡溪恣偃仰預拂霜綃以待君一揮欲使羣山響
記取雪深一丈時山人須鼓山陰樂

送東雲雛孝廉

羨爾能高卧蓮華峯下居青袍雙鬢老黃葉二陵疎已著
潛夫論還陳災異書故人京洛徧問訊近何如

寄懷胡蒼恒憲副

壯志堪乘障浮名悔入關人疑龍性傲官似馬曹閒板屋
青羌俗柴扉紫邏山邊城須衛霍未許拂衣還

清水道中

隴阪高無極清秋望更賒石林千疊水板屋幾人家古驛
羊酥飯空山燕麥花停驂問耆舊井稅說頻加

發鳩茲陳伯璣欲偕至維揚弗果次采石爲別

纔買蒲帆指秣陵青山此日興堪乘飢來自笑空倉雀歸
去真如脫鞵鷹荻岸風多搖鷺影江潮夜落見漁燈蕪城
八月枚生筆欲起觀濤病未能

劉越石聞雞處

衰柳平沙古渡村傳聞此地舞劉琨鞭惟祖逖能先著客
有盧諶感舊恩江左衣冠空北顧古來天地此中原雞聲
依舊清霜曉招得并州萬里魂

銅雀臺

三臺縹緲鬱相望俯眺中原接太行鳳觜香殘歌舞散魚
鱗瓦冷館池荒漆鐙詎有千年焰總帳空施八尺牀何似
金人汾水上茂陵風雨泣劉郎

登西嶽廟萬壽閣

崔巍傑閣玉爲寮
白帝離宮倚絳霄
檻外河山三輔小
巖前觴豆百靈朝
明星環珮雲來溼
仙掌芙蓉雨欲搖
會御長風凌絕巘
青鸞背上夜吹簫

登華嶽作

獨上鉤梯覽大荒
秦關終古氣蒼蒼
天開閭闔纔尋尺
地界雖梁入渺茫
五粒松搖羣帝珮
三漿露挹百神觴
仙人方罅青冥上
更欲淩風度石梁

松風謾謾步虛聲
策杖高尋衛叔卿
星近祠壇光欲墮
月臨仙掌夜偏明
扶桑萬里天雞曙
箭括三更石馬鳴
誰信揚雄擅詞賦
不將綵筆記層城

鸚鵡

雕籠萬里託征鞍
辛苦何辭行路難
幽閣恰添嬌女伴
方

音猶作部民看且分薄俸供秔稻莫遣春風瘁羽翰流水隴頭相憶否朔雲邊月不勝寒

庚寅獄中感懷

商飈涼勁秋昊天降霜露采采孤葵根展轉愁其足幽蘭在庭柯馨香莫能蠹君子諒不惜零落傷中路庶事多賢理人生信所遇俛仰終古間誰知龍與蠖

夸夫競權勢志士懷榮名殺身非一端天道常患盈湯湯桐柏水有時濁且清羲和無停策日月東西征自非空桑子豈不念所生宛彼鳴鳩詩悽惻涕沾纓

中夜聊假寐飢饉嚙我耳擁褐步檐櫺衆星粲可指中有琴鼓聲清商激綠水哀絃隨悲風曲終忽變徵茲音久不作勿乃鄒陽子沈憂蕩精魂欲訴誰爲理

僕夫橐餗粥投筇誰能餐徒隸向我語廟室西南端往者
楊左輩頸血於此丹恍惚陰雨時絳節翳飛鸞再拜招其
魂毅氣不可干嗟余亦何爲喟然傷肺肝

挂劍臺

延陵季札賢公子腰下芙蓉淬秋水一片心期不忍寒蕭
蕭隴樹虹霓紫歷聘諸侯未反命魚腸剗及王僚死躬耕
三讓宗家法吳邦不受輕如屣當時列辟尙權謀劍客縱
橫仁義否君臣父子競相居谷風之刺徒爲耳公子深憂
在萬古聊因死友扶人紀縞紵非無肝與僑千金獨向徐
君委竭來酌酒想遺風荒臺半圯埋寒叢麒麟寂寞一杯
土誰其樹之松柏桐人言墓草似干將轆轤鐔鼻將無同
三十年來不復甲枯根或化爲蛟龍水湯湯兮風烈烈簞

火黃昏讀殘碣金石有時銷此誼長不滅君不見交態紛紛等阡陌任昉門前無弔客

贈鄭汝器歌

近代八分復何有專家獨讓莆田叟

莆田朱珏善八分書

作者紛紛

祖唐隸臃腫支離轉麤醜鄭君博物饒天姿書法遒勁多離奇老筆縱橫森劍戟尺幅光怪盤蛟螭大書徑尺懸鼻屨髣髴再見嶧山碑家藏圖書半秦漢陳倉石鼓宣王詩岫嶠傳疑夏王禹之罘篆刻丞相斯縹緗卷帙各精好巖搜壑剔將無遺我來焚香肆展閱神游三代觀鼎彝主人愛客出斗酒高齋日午桐陰移况復髯兄善豪飲醉揮三百金屈卮君從壁上觀人醉獨踞匡牀作奇字潑墨淋漓四座驚咫尺蒼茫風雨至昔我持節隴首經磨洗中郎薈

閣銘會將什襲稱雙絕置向浮嵐暖翠亭

余家藏黃大癡山水曰浮嵐暖

翠圖因以名亭

竹巖草堂歌

膠城朱松鄰白門濮仲謙皆以竹器擅名

君不見練川朱生稱絕能昆刀善刻琅玕青仙翁對奕辨
毫髮美人徒倚何娉婷石壁巉巖入煙霧澗水松風似可
聽鏤玉雕犀安足誇玻璃可碎犧樽腥白門濮生亦其亞
大朴不斲開新硯虬鬚削盡見龍蛻輪囷蟠屈鴟夷形匠
心奇創古無有區區荷鍤羞劉伶妙製流傳眞者少何侯
得之爲異寶大書深刻作堂額客至登堂多不曉我來問
名請縱觀錦筍纔開稱絕倒黃俾蒸栗縵且堅潤比瓊琚
兼肉好何侯啖我燒羊胛華髮臨風除白帟階列唐昌觀
裏花欄餘甫里先生鳴美酒元從白墮留新筍更得青州

法南人不慣北人歡繩牀坐聽糟牀壓君不見蔡邕笛千
年人去亭名柯詎若龍鍾古節大如斗真堪一日十摩挲
銅盤絳燭朱顏酖升君之堂爲君歌年來已厭烏程釀客
中十斛須相餉沙棠樹下牡丹叢蓓蕾計日應全放殷勤
欲倩好風吹痛飲還期明月上預勅雙童洗竹罌待我醉
卧青絲障

贈馬南宮參戎

君昔銜命赴臨洮少年意氣何雄豪狐白之裘秦復陶袴
韉帙首烏孫刀雪深草淺牽旅獒手格猛獸如童羔綠熊
赤豹遠遁逃生取蒼兕拔其羣屯田蕪沒愁耘薊黃沙磧
裏飛蓬蒿金城戍卒飢嗷嗷翁孫方略徒煩勞安西都護
醉葡萄誅求絡繹窮秋毫旋從丞相征哀牢五月渡瀘入

不毛苴蘭城下血戰鏖蠶叢鐵馬隨猿猱李廣數奇功則
高猿臂不得擁旌旄長嘯歸來脫錦袍黃公酒壚換濁醪
鱸魚三寸蓴可芼安能俯仰同桔槔美人環珮逢江臯感
君一曲求凰操畫眉筆染青螺膏鸛鵒紫硯箋薛濤調絲
未央參翔翺玉臺新詠鏗雲璈溫柔有鄉堪醅醕何勞錦
字貽寶滔灞陵醉尉空嘈嘈吳鉤夜作蛟龍號孫盧餘孽
阻風颺天威赫怒集征艘樓船十萬聲喧囂何人爲薦公
孫敖熬弧重繡解弓弣洗清瘴海爲城壕雲臺圖畫鄂與
褒道傍笳鼓驚兒曹丈夫窮達信所遭

市驢行

問伯寺前黃紙下黔首不得畜匹馬輪官者後罪無赦駮
駟驂駟棄中野走馬糞田史有書房星天駟光模糊柴車

嶙嶙鸞噉噉負輓者誰大宛駒五陵富兒顧廝養蹇驢價
出龍媒上素絲作鞭金絡頭驕嘶奮鬣行長楸

雪夜蘋園聽何山人彈琴歌

瑞雪戔戔照金罍主人置酒臨高臺座中有客操綠綺使
我徒御皆心哀寒風蕭颯空堂裏一曲未終棲鴉起忽疑
空山雷雨過倒掛飛流聲齒齒又如班馬之羣鳴千騎萬
騎行復止山人本自雍門客長裾恥向王侯宅結友偏多
俠少場貧來獨有丹青癖醉時攜得虎頭筆滿壁雲煙峯
削戍生綃高捲洞庭雲綵毫孤映蓬萊日絲桐筆墨各有
神琴理真從圖繪出水仙海上霧濛濛廣陵絕調隨春風
絃際何由識今古胸無邱壑難爲工伊余自歎嬰塵鞅五
嶽空懷何日往煩君爲鼓一再行能令宗炳羣山響趙郎

善手寫金徽更爲變徵淚霑衣明月疎鐘兩搖落滿地清
霜鴻雁飛

從軍行送王玉門之大梁

有客有客髯而紫左挾秦弓右吳矢自言家本關中豪黃
金散盡來江沚年來倦上仲宣樓裏糧且訪侯嬴里腰間
匕首徐夫人河上荒祠魏公子懸知弔古有深愁慷慨登
車不可止自從盜決黃河奔大梁未有千家村烽火但增
新戰壘塵沙非復古夷門短衣聊向將軍幕長劍終酬國
士恩落日驅車臨廣武春風試馬出轅轅丈夫佩印乃恒
事安能鬱鬱老邱樊王郎顧我深歎息一見歡如舊相識
此行不但爲封侯人生貴在抒胸臆江上楊花白雪飛梁
園芳草青袍色盾鼻猶堪試綵毫鶯聲聊爲停珠勒醉後

狂歌氣若雲軍中教戰容如墨春風拂地車斑斑起看明
月覽刀鏝平臺賓客久零落至今汴水空潺湲憐予偃蹇
風塵際年來磬折凋朱顏已知苦被雕蟲誤强弩欲挽不
可關待爾他年分虎竹相從射雁終南山

詔獄行

秋官署中有老吏能說先朝詔獄事當時國是日紛紜太
阿柄倒歸閹寺天子高居問尙公公卿標榜排清議遂有
羣凶作爪牙鰲虎蒼鷹最毛鷲長樂宮前傳片紙金吾夜
半飛緹騎衛尉將軍身姓許提點官旗北鎮撫讞決惟多
王甫歡累囚欲辯張湯怒洗垢新懸忱命法揮毫已入追
魂簿甫聞北闕殺劉陶旋見西亭尸竇武白骨交撐裹赭
衣殘骸誰敢收黃土爾曹自謂盤根株殺人狐媚誇良圖

豈知神理有反覆昊天明明安可誣神姦脫距競菹醢亦
有然臍當路衢長安萬姓歌且舞賣釵鬻釧沽醢醢海水
羣飛桑畝移俯仰乾坤又一時三君八俊俱塵土膺滂田
寶無墳基彤管堪嗟酷吏傳青苔半蝕黨人碑我今胡爲
淹此室園扉白日啼寒鴟冤魂欲招不敢出但聞陰風蕭
颯中心悲中心悲淚盈把酌酒呼臯陶臯陶竟喑啞古來
萬事難問天蠶室誰憐漢司馬君不見城上烏啄人曾不
問賢愚新鬼銜枚向都市年年寒食聲嗚嗚

雙燕歌

雙燕復雙燕去歲春明江上見今年知我在網羅飛飛萬
里來相唁忽似天涯絕域中楚然驟得逢親串支頤強起
暫爲歡撫事哀歌淚如霰吁嗟我生太荼苦羽毛摧剝飢

膚賤鴻雁高翔那肯顧鵲鴝夢斷空凝盼東風夜夜吹歸
心故園桃李開應徧燕兮少留聽我語獄吏雖苛不嗔汝
長安挾彈多少年汝今銜泥向何處楚館吳宮久寂寥野
花爛漫縈遺礎翡翠樓頭許暫棲恐妨思婦夢金閨蕩子
從軍去不返年年芳草春萋萋碧紗窗外霏霏雨恨殺南
飛烏夜啼

古銀槎歌

我有匣中銀鑿落碧山山人手所作背鏤至正壬寅字點
畫形模今宛若斷節枯根紛錯糾中有仙人搏望侯衣冠
甚古鬚髯蒼飄飄一似乘孤舟肘後惜無筇竹杖袖中或
有安石榴人言八月泛天漢支機石畔逢牽牛奇事流傳
見圖畫鍊師何意窮雕鏤當年親致汗血馬飽歷條支經

大夏安知骨貌久銷歇
供人把玩充杯棗金人已去柏梁
臺玉液常霑白蓮社
嗟我瓠落溝斷同潦倒賴爾衰顏紅
有酒如澠不稱意欲求仙術尋壺公
跳身此槎之腹中窮
源再入馮夷宮爲侯改號鵬夷翁
胡爲低眉偃蹇在塵世
枕蛟騎虎愁我躬

夜雨留方爾止宿次日將之宣州

相逢吟落木此別歎流螢
偃蹇羞郎署飢寒逐客星
簾光搖竹翠江雨帶帆青
歸日吾能待新詩滿敬亭

宿摩訶菴

不意能來此高僧共默然
燈傳無盡劫花有再生緣
幻夢初弦月微軀小劫年
畫廊松影外呵壁問諸天

喜王西樵至湖上

伏枕南屏寺聞君脫爵羅翻然具舟楫及此問煙蘿驚定收雙淚悲來著九歌惠連新句好惆悵未同過

惜別魂猶悸相逢病欲蘇全身來北寺留眼看西湖白社期同往青山道不孤故人曹鄴在吟眺慰窮途

顧菴學士客湖寺

剡溪道中

昔人乘雪往而我溯風行萬壑穿雲轉孤舟與石爭魚游寒水見鷗立夕陽明安道留遺宅寥寥千載名

和曹顧菴學士湖舟泛雨

盪漿煙初破迴橈雨未收樵歸梅半斧候暖麥將秋雲氣藏山寺江聲抱郡樓客懷俱拓落不但爲依劉

申園同姜如農作

舊與張常侍同吟桂樹歌重來松鼠大相對渚禽多花氣

侵衣袖茶煙隔薜蘿終焉遂疎懶白首問漁蓑

寓侯記原柅園

飄泊仍吳會淒涼但越吟鄉遙悲去雁春晚見來禽老病
初攜杖良朋喜盍簪婁塘隄上柳步履定相尋

上巳遲三月

是年閏二月

高齋自一家魚梁連竹屋雞柵縛藤

花萬木偏能冷羣鷗未覺譁臨邛頻送酒莫遣豹奴賒

未忍辭君去行行且復淹酒鎗朝尙卧花箭夜來添

齋中蕙開

極盛

白鳥聲相亂黃魚價稍廉東鄰如可問龜策未須占

檢閱故人姜質簪遺橐泣然有作

宿草萋萋幾度春招魂不返大江濱安知嗣祖非爲福況
有要離可作鄰良友心期爲楚些孤兒風貌是吳人西風
似翦吹殘燭三復遺文淚滿巾

九日同姜如農王西樵程穆倩諸君登慧光閣飲於

竹圃分韻

塞鴻猶未到蕪城載酒登臨雨乍晴山色淺深隨夕照江
流日夜變秋聲上方鐘磬疎林滿十里笙歌畫舫明空負
黃花羞短鬢寒衣三泮客心驚

夏考功先生廿年淺士門人盛珍眎卜地葬之以其
夫人祔焉余高其義爲詩以贈

幾年松檟缺經營負土荒原賴友生曾賦國殤悲翟義竟
無傭保付王成月明大鳥來華表劍合雙龍捲素旌二陸
冤魂應共語雲旗風馬笑相迎

羅以獻胡去驕將歸武陵漢陽小集南園卽席分韻
纔從雙屐探梅萼忽送孤帆折柳條唳鶴灘頭春欲盡鷗

鷓鴣坡上夢方遙
生徒南郡悲長笛
詞客西京有洞簫
我亦因君動歸思
那能長住伯通橋

重晤李舒章

漠漠陰風吹草萊
故人悲喜更銜杯
競傳河朔陳琳檄
誰念江南庾信哀
避地何如金馬署
傷心莫問柏梁臺
蛾眉自昔逢謠詠
嗟爾登高作賦才

元旦

白項烏啼接曙暉
條風依約滿圓扉
非關潘岳爲郎拙
自是虞翻與世違
滄海尙懸逋客淚
清霜甯爲賤臣飛
故園鷗鷺應相誚
辜負三春薜荔衣

送顧勉齋督餉關中

柳色依依邊馬鳴
故人萬里賦西征
漢江舊繞褒斜谷
蜀

道新懸驃騎營磧裏梅花春不度樓中羌笛夜偏清相看
懷抱蕭條盡隴水秦雲雁幾聲

聞郭輝竹赴難志感

側身東望獨含愁尺素俄傳解我憂黨禍得無驚范母故
人來必是王修欲投豺虎呼蒼昊肯使錢刀感白頭俠骨
未妨頻煅煉若盧扉裏醉鄉游

冰雪河梁送汝歸至今烏鵲尙驚飛未辭羽翮懸弓繳何
事風波及釣磯梁獄有書愁按劍秦庭幾客賦無衣懸知
執手還如夢顏鬢年年半已非

送徐子九之任麻城

昭邱南望鬱蒼蒼有客鳴榔過武昌楚國菁茅初入洛漢
臣詞賦舊懷湘月明挂席聞鴻雁秋老登樓見鳳凰若到

江南逢小謝寄言幽夢滿池塘

送何葵如歸里

年年作客雁先還
纔說歸期鬢已斑
落日片帆天際遠
那能相送鶴兒山

漂母祠

楚媼祠邊薦白蘋
誰將卮酒酹王孫
千金一飯猶思報
肯負高皇吐哺恩

舟中見獵犬有感而作

秋水蘆花一片明
難同鷹隼共功名
檣邊飽飯垂頭睡
也似英雄髀肉生

黃耳傳書事不訛
松江高塚尙差栽
韓盧烹後功臣死
莫向淮陰祠下過

癸丑上元游赤壁作

步屨臨臯芳草生斷崖千尺夕陽橫賦成赤壁人如夢江
到黃州夜有聲雪後歸鴻頻代謝渚邊孤鶴自哀鳴煙波
極目憑闌客載酒還應酌月明

舟中卽事

老作成都客飄搖愧卜居招魂詞賦客訪古歲時書鳥道
王程遠猿啼鄉信疎同舟親串喜新食武昌魚

宜都阻雨入夜始霽自荆門虎牙山而上羣峯絡繹
險怪萬狀蜀江之奇自此始

艤舟背山郭寒雨方淒淒愛此澄江水色映青玻瓈北岸
殊不然一石五斗泥同流判清濁勢與涇渭齊宵分星漢
出捩柁鳴晨雞虎牙旣雄互荆門不可梯羣峯互方圓參

差壁與珪層巔挂飛梁千仞垂虹蜺石子何磊磊往往絕
徑蹊榜人半赤脚重繭如馬蹄小子但果腹歌嘯忘酸嘶
嗟余懷寸祿遠適瞿唐西巫山沙安極巘嶢方端倪晨夕
展游眺童穉相提攜快哉篷窗內偃息成幽棲

泊舟夷陵作

百丈挽孤舟譬諸禦勁敵黃頭運長篙森然列矛戟伐鼓
以爲節進止有成畫喧呼股雷霆魚龍應辟易草間覓微
路蜿蜒入山脊蜀兒誇身手攀緣類蜥蜴乘風張素帆眩
目失青壁蒙茸巖際花斑駁沙邊石小市聞魚腥近郊留
虎跡夷陵楚西門歷年困兵革黃牛未百里江流疾如射
雲岑莽虧蔽波濤相委積蕪沒明妃村蒼涼屈原宅景物
足留連畏此簡書迫浩歌對鷗鳥俯仰悲行役

南津關

卽西陵峽

奮棹入西陵實惟三峽首耳目霍然新乾坤劃初剖巴江
萬里來莽莽開戶牖大禹驅龍蛇羣峯儼趨走錦屏百疊
張翠壁千尋陡崖谷異昏明亭午氣如酉釋慍青蘿幽龍
葱白雲厚繪事讓鴻濛天然色丹黝怪石何時崩雷文辨
蝌蚪長年告中飢步履坐林藪苔荒杖屨危徑仄趾相蹂
捫弓落雉媒垂綸出魚舅揮杯勸吾儕此樂良非偶

黃茅灘

羣山夾江流其形如囊橐緬想太古前神功勞斧削直下
塞坤維高空插冥漠崩浪屢洄漩層巒迭參錯罨畫象樓
臺岩巖類城郭翠含青黛光白者爲粉堊沿廻路已窮側
轉忽開拓煙際見漁舟遙遙一秋籜涉險卻恬嬉勝賞反

驚愕渾似逢異書披覽得約略行行止三舍樵爨倚山脚
方音聞鷓鴣暝色下猱獾洶洶怒濤哀嬾嬾山泉弱興來
抽短毫庶幾慰飄泊

捕魚行

新灘之險天下無瞿唐以東稱畏途波濤壁立走雷電下
瞰疑是蛟龍都驟窺瀕洞破心膽坐觀笊簒成歡娛漁人
取魚逐灘響不勞烏鬼家家養年年巴蜀雪消時千百爲
羣魚大上歟珠跋扈氣成龍觸石驚跳力如象騰身爭欲
挾雲飛紅鬚翠鬣翻銀浪死生禍福只須臾早見修鱗出
罾網已困泥沙尾尙搖半銜葦索頭還搶甯論鯉鯉與鱗
鱗百錢賤買充餽糧不分流膏兼飼犬可憐登俎共牴羊
我行見此欲掩鼻鮑魚之肆古所傷落日回舟召親友吾

儕幸脫鯨鯢口計日應嘗丙穴魚爲君滿酌郛筒酒

新灘歌

江水遠赴瞿唐門建瓴而下勢欲吞東過秭歸峽逾逼雙
崖突起如藩垣神龍在檻虎被縛自然拏攫還騰奔巨石
中央列戈戟雲霾雨蟄磐孤根滌洞未肯注東海朝宗詎
識天王尊天吳九首作窟宅當年割據哀公孫老蛟晝號
猿夜嘯估客萬里傷心魂疑是共工怒頭觸崑崙折天柱
又似樊將軍毛髮衝冠皆倒豎叢祠血食飽淫昏開鑿無
人念神禹岸邊林立黃頭兒負戴裝囊半村女攀蘿捫葛
勝丁男頭上銀釵已非古行旅紛紛學魚貫鄰船隔舫更
相喚一舟纔過萬人呼沙頭雜坐忘餐飫西來舸艚去如
箭死喪之色人人面濤聲斷處卽安瀾咫尺分明割鄉縣

舟人醺酒妻拏喜，歷盡驚湍觀已止。
艱危莫漫數黃牛，鹿角狼頭曹檜耳。

戲題督郵爭界石

何年攘臂此山頭，風俗傳聞兩督郵。
蜀國至今悲杜宇，楚人終是戀鵝鴟。
懣愴桑屢換身安屬，朝市頻更怒未休。
怪事荒唐君莫笑，古來黨禍本清流。

天生橋歌

天台石梁百餘丈，縹緲丹梯不可上。
匡廬瀑布垂雲端，銀河倒挂千巖間。
苧溪之水西北來，發源月窟何雄哉。
驪龍正睡老蛟蟄，何人鞭起生風雷。
雪山峩峩仆冰柱，馮夷怒擊靈鼉鼓。
六鰲鼻額高崔嵬，濺玉霏珠自吞吐。
虹橋橫跨出天然，元氣渾茫絕斤斧。
奔濤忽斷咽不流，下穿雙穴如

咽喉須臾潰決勢莫禦動搖林壑風颺颺萬鈞强弩齊注
射驂騮頓掣金絡頭我來濯纓還洗耳酌之不異中冷水
猿啼虎嘯車馬絕可憐汨沒空山裏噫嘻乎古來賢士輒
軻亦如此必逢困阨聲名起屈子離騷馬遷史不得其平
應爾爾殘月輝輝攪醉眠猶覺泉聲撼窗紙

李之芳字鄴園武定人順治丁亥進士授推官官至文
華殿大學士諡文襄

詩話文襄初授金華推官行取御史慷慨敢言出視
兩浙鹽課累擢專圻值取精忠爲亂溫處金嚴所在
蠢動文襄駐節衢州分軍戡定蠲賦治賑撫輯流亡
內召典中樞贊大政勲名爛然漁洋爲墓碑謂在言
路爲真御史在臺端爲真中丞開府巖疆不動聲色
使東南數千里危而復安正色立朝始終一節爲古
之社稷臣論者咸謂非溢美也

同施愚山陪祀郊壇

太乙瑤壇接露臺
龍旌遙拂翠華來
仙韶細度雲門奏
玉殿初明泰時開
千尺爐煙天外轉
九重黻佩月中迴
祠官解有登封意
獨向甘泉擁賦才

馮溥字孔博別字易齋益都人順治丁亥進士官至文華殿大學士諡文毅有佳山堂詩集

詩話文毅壯歲登朝迴翔臺閣一時高文典冊多出其手康熙己未召試博學鴻詞與高陽李文勤寶坻杜尚書崑山葉文敏同閱卷得人最盛在京城東隅築萬柳堂偕諸名士觴詠其中風流儒雅照耀當世佳山堂集王貽上毛大可陳其年諸人爲之序至謂其言大義深渾括萬有上繼謨誥風雅之遺稱誦師門不無太過

行路難

長安豪貴起大屋日食萬錢苦未足
洛陽年少來上書旁觀笑破絳灌腹
昔日信陵謀孔艱車騎喧闐老抱關
太史

猶記東門裏過者徘徊不忍還嗚呼躡屨擔簦日三喟人
生報恩會有地

少年結交意氣豪杯酒歡娛贈寶刀出門一笑輕其曹銘
鐘鑄鼎等鴻毛白日晡曖不相待霜刃繡澁沉光彩無復
伏波銅柱勳空愁薏苡飛書在嗚呼茫茫塵氛無要津棄
繡破浪屬何人

紉蘭不耐久磨刃空傷手樹鍛既不堪犢鼻亦可醜丈夫
懸弧志四方焉能跼蹐徒俯首脂車秣馬越太行自信險
阻無掣肘我車脫幅我馬卒瘁前有虺蛇後有猛虎將伯
無助困於林莽咄嗟歌白石慷慨問青旻孰知坎壈蓬蒿
士亦有當年稷契臣

秋日飲酒詩

秋色從西來吾齋何瀟灑涼颼拂襟袖老眼作小楷念此
筋力微自笑如童駉山容淨遠眸天清暑已解重曝晏子
裘莫怪侏儒矮高朋正滿座樽空更須買取樂少年同頓
忘吾體憊況有吹簫人取材谷之嶰華燈宜高張梁塵嫋
嫋擺不醉未云達遑恤旁觀駭試看戰士苦甲披猶重錯

紀異

己未秋七月廿八直官廨震動起重淵衰老適相避初聽
蛟龍吼水勢湧澎湃復擬雷霆怒擊物刀必共奔走爭一
門洶洶羣奪隘帽脫鮮結纓袒裼任衣袂跬步暗前途舉
足迷所屆造物胡不仁或是天地噫倉猝遽乖異喘定神
尤憊戰慄色各變相對不能話招魂幸得活傾壓分一界
豈是九河復溝裂分多派屋覆勢連雞牆徹溷貴介嗟哉

土中人狼藉如填債上帝降禍凶下土橫彫瘵貧者束縛
去富室或歌薤逆旅親戚絕慘被蠅蚋嘅皇仁眞浩蕩發
帑賑頽壞無主勅官瘞丁甯勤告誡小人復貪利木石十
倍賣至今露處多入室如畏蠶席亦不易得婦子衣裳絰
街頭燈火繁團聚渾結砦淒涼逢陰雨鄭圖非所畫災祥
昧其原夫子不語怪俗訛鰲極翻吾將具十牂

贈唐濟武

折檻焚魚句獨工參禪學道跡雙融閒來幾捆牛腰卷醉
後千村驢背風小過舊知惟硯北同人新興在江東卽今
握手春明裏不擬人間問轉蓬

籬菊花繁九月秋去年有客賦同遊文章海內無雙手公
望詞林最上頭狎主齊盟鄰友在揭來燕市酒徒留蜀箋

欲買三千葉鈔取新詩慰老眸

九日同沈繹堂羅振彝王仲昭吳志伊陳椒峯登善
果寺毘盧閣

蒼涼霜氣未深寒九日招提倚佛欄過眼征鴻難並翼入
盤紫蟹且加餐天龍八部垂垂老日月雙丸冉冉看陶謝
賓朋欣滿座黃花欲插更彈冠

蘆溝橋行

蘆溝之橋走百貨柴車阻塞斷人過前車脫軛扶牛立後
車挨幫騎馬坐須臾十車五車橫千車百車不肯行日中
相望愁日暮九衢遙矚走崢嶸豪貴馳來鞭撻厲回轅讓
路開復閉念子氣驕衣裳單天寒露宿眞拙計都城百雉
開九門九門亦復如雲屯侯家應有車千輛牛馬風塵日

月昏憶昔子鍼來奔晉華軒炙轂夾道進觀者驚愕未敢
言雷轟電掣公卿震富貴事君莫等倫不見詩詠車麟麟
寄言行役冠裳客好遊驅車獨力人

黃機字次辰號雪臺錢塘人順治丁亥進士改庶吉士
官至文華殿大學士諡文僖有浥露堂詩文集

讀歐陽永叔秋聲賦有感

執素不盈尺撫桐何事絃夜氣還太初杳無塵慮牽清商
入林杪抱膝忘吾年人生感榮辱而自損其天聞茲檐外
聲烏乎使之然

和高念東先生六合道中作

寄眼秋光好停車問所經迴峯藏短徑疎竹掩空亭稻熟
平樓畝蘋開淺見汀蔣山新入望端爲客來青

王熙字子雍一字胥廷號慕齋宛平人順治丁亥進士
改庶吉士授編修官至保和殿大學士加太子太傅

進少傅諡文靖

詩話文靖早入翰林善談史事習清書逾年學成
世祖屢試稱最敷歷臺閣歷六官幾徧於國家典制
鉅細周知同朝歎服詩
清麗芊絳時有佳句

小樓冬月

向夕煙消大地平海洋扶月上瑤京山河影射千門靜城
闕光涵太液清霜靜高旻流素籟風微小閣敞新晴鄰鐘
欲動光初滿蕭瑟還驚離別情

夏日東章紫儀

思君好亭子閉戶卽山林繞屋清光迴盈階碧草深素琴
宜靜夜涼月發高吟此地疑無暑微風起夕陰

紫竹院

紫竹禪關迴虛亭老樹前檻低花影靜林密鳥聲傳鐘梵
閒清畫池塘徧野泉夕陽樓影下歸騎破春煙

郝維訥字敏公霸州人順治丁亥進士官至吏部尙書
諡恭定

詩話恭定精於吏事分巡延邵擒劇寇張自盛爲民
除害入爲京朝官貳戶部四年長吏部九年裁定法
令俾後來者
可以率循

寄題五老峯

廬嶽岩巒隱列仙五峯離立蔚藍天玉膏瑤草襟期外白
鶴青牛警效邊極目蓬萊惟一氣共餐沆瀣自何年終期
振策三梁上賓主逢迎意儼然

任克溥字海湄聊城人順治丁亥進士授推官官至刑

部侍郎加尙書銜

詩話海涓成進士授南陽推官值大兵之後披草萊
治城郭招集流亡深有恩意入爲吏科給事中數上
封事皆關大計年逾九十乃以尙書致仕乾隆間嘗
特命出所條奏宣示中外裕陵諭謂克博逮事兩
朝抒誠建白無愧直言謬謂之臣云

游鵲山院贈蹇修上人

偶來尋古寺雨後得餘清漠漠人煙外冷然一磬鳴禪牀
隨處穩秋草就階平只恐深山去雲霞隔幾層

李敬字聖一號退庵六合人順治丁亥進士官至刑部
侍郎

詩話退庵自訂詩文集未刊漁洋盛推其詩謂不減
古人僅存二十餘篇於咸舊集中稱其讀水經注憶
洞庭一首極佳然五言尤勝直逼元暉律句亦具體王孟惜全集之不傳也

天甯洲至六合

纖纖蘆上月歷歷船中曉風鳥共一輕江天相與杳雲歸
三楚秀山點六峯小滁水迴曩游靈巖發新眺

孤館

孤館多雨色青苔被階墀秋風行半道元蟬催高枝佇立
裁錦字信美將誰思空廓易流響非復墮釵時盛年不自
得良覲難重期安得隨陽鳥緘書寄瑤池

清明泊瓜步阻雨

愁思如芳草春程不斷生停雲連野色過雨挾江聲瓜步
新添水清明遠送行強從吳客語歸計羨朱櫻

登嶽

尋山有仙骨出沒御天風歷歷游觀處蒼蒼煙霧中靈芝
光可遇福地脈俱通日落予心息還期鐵腳翁

過武昌

四時常不極一棹况無涯
擊汰天疑路停橈水是家
危洲行處直遠郭望中斜
沙勢銜山影波光蕩日華
蘆明空岸雪葉亂晚陂霞
稍辨武昌樹初飛夢澤鴉
客愁增湍駛楚色滿蒹葭
欲訪河干叟林端見古槎

洞庭望月

好風臨湖水清光不可分
有天涵萬象無地點微雲
鄰笛聲相應仙舟影絕羣
如何風外雁偏向夜深聞

春晚

春晚草萋萋流鶯不住啼
酒醒亭午後人憶秣陵西
愁緒散還結月花高復低
緘情書札在珍重更封題

青溪曲

十里青溪半藕花
亭臺相向夕陽斜
小姑不解傷心事
夜夜月明來浣紗

過準提庵用退之韻

檜柏秋陰石路微
荒園草長殘蝶飛
老僧學佛兼學圃
豆花雨漬豆葉肥
我來踏穿獅子窟
繩牀塵滿坐者稀
所須月米纔半鉢
黃菜撲面飣朝飢
去年屋破雪堆席
今日牆鼓風打扉
睡漢世法且不貫
縱施廣舌何罪罪
龕前大士慢千劫
門外枯松徑十圍
隨便趺坐卽起去
休留棘刺橫牽衣
快哉白雲如奔馬
兀突那復爲人機

讀水經注憶洞庭

坐倚巴邱俯洞庭
君山一十二峯青
不聞修竹來仙吹
但有孤鴻送客舲
欲辨水天惟北斗
若當風雨卽南溟
舊游

浩渺如春夢兀看酈元注水經

宋徵輿字直方一字輟文華亭人順治丁亥進士歷官

副都御史有林屋詩草

詩話直方少與陳臥子李舒章齊名亦幾社後勁歌
行沈鬱其七律古意一首歸愚謂酷似楊升庵塞垣
詞

參軍行

檀州軍敗洩南陷鐵騎西山逼雲棧九門辛苦坐公卿按
兵不動有高監玉堂美人何不平上書北關苦論兵參軍
新命一朝下單騎夜出長安城是時主將盧司馬獨將西
兵兵力寡不教國士死黃沙別遣參軍向城下參軍不行
司馬嗔參軍旣行司馬陳北向再拜謝至尊曰臣象昇死
國恩鼓聲闐闐軍出壘司馬一呼創者起三萬邊兒夜合

圍孤軍雖勝終鬪死朝廷頗輕死事功翻疑訟疏多雷同
司馬精爽久寂寞參軍一官成轉蓬嗚呼國家賞罰未可
測歸耕匡廬隱亦得

襄陽曲

襄陽二月花豔時城頭高曳五丈旗東風一夜動笳鼓夾
城傳呼丞相歸紅纓金甲光炤日霜刀亂揮賊爭出倉卒
誰辨非官軍滿城鼎沸嗟何及峴山日落黑雲重大隄女
兒哭相送襄王宮殿野火燒何人更起獵雲夢

贈張燕客

我來勾踐國結交張公子華燈夜相迎痛飲從此始三尺
羅袖紅一尺虬髯紫紫髯飄飄拂予肩自言疇昔稱少年
西走咸陽北走燕終南太行相接連此鄉索寞少奇士風

沙萬里心茫然以茲感歎歸故鄉黃河千尺流湯湯河隄
蓄水山平地決之可以沈大梁黃龍青雀未可測果然今
日成懷襄酒酣對伎重岸幘重道當年解音律琵琶絃索
誰第一武宗供奉查八十萬厯季年范昆白雷轟鐵撥今
有誰練川陸曜稱傑出聞君此論多欽崎河轉星稀未忍
歸歸來落月屋梁西卧龍山上烏亂嘯

古意

碧玉堂西紅粉樓長安歸思憶涼州咸陽橋上三年別回
樂峯前萬里愁秦地煙花明月夜漢家關塞白榆秋夢魂
欲識金微路應逐交河水北流

長信草

青青長信草無意學逢迎不厭淒涼地春來還自生

下灘

孤舟瀉石灘雙槳下雲端浪湧分花路濤驚濺雪寒亂山
皆曲向飛渡怯廻看千里無諸國天南自鬱盤

谷應泰字賡虞號霖蒼豐潤人順治丁亥進士厯官浙

江按察司僉事提學道有築益堂詩集

詩話霖蒼撰明史紀事本末典章事蹟首尾秩然每篇有論仿晉書體皆作儷語文縟氣清曲折詳盡督浙學所識拔皆一時知名士陸清獻其一也詩雍容溫雅一洗明季纖仄之習

游道場山

丹岑連絕漢金刹倚晴空花散珠林雨松迴古殿風寒煙
生樹杪孤磬落雲中尙有荒亭在憑軒憶遠公

張坦公先生放鶴亭招飲

春風楊柳盡垂絲湖海飄零對酒卮忽憶彭城今夜雨滿

庭芳草鶴歸遲

張坦公擢少司空北上

樓船北指少司空三月江南聽去鴻
謀國上書惟賈傅救時入洛看溫公
幸陪祿食旬宣久悵望鶯花去住同
何日皇州春色裏鳴珂紫陌一相逢

季開生字天中號冠月泰興人順治己丑進士歷官給事中有冠月樓詩出關草

詩話天中早擅才名以建言謫戍直聲震天下其尙陽堡卽事詩云極塞有山皆北向重邊無水不西歸忠愛之忱溢於言表

關前誌別

罪軀幸得主恩全餞酒蕭條轉授鞭
奄普灘平魚陣淺句離天闊雁行偏
不辭馬骨埋邊雪敢惜牛衣卧塞煙
今日

玉關無外內臨歧握手莫潸然

尙陽堡卽事

草橋跨澗水粼粼不厭羊裘把釣綸每愧野人勤給米久
勞鄰媪代炊薪牀前見月家園夢雪後聽鴻兄弟情消濁
卻憐詩興淺三秋不敢憶鱸蓴

鑿冰十丈得泉歸卻望千峯白雪圍海岸漁樵生計淺天
涯親舊過從稀頑山入屋霜連枕禿樹當門月上衣窮旅
不堪兒女怨夜添松火敵寒威

新燒懸崖淨積莎遠隨甲騎渡柴河虎頭在客休投筆雞
肋從軍漫荷戈骨肉書傳遼塞少林泉話入故園多邊城
老將秋霜下夜半聞笳起自歌

五雲長繞舊皇畿萬里孤臣寄翠微極塞有山皆北向重

邊無水不西歸雞鳴夢訝參朝晚鳥哺心傷進膳違甯惜
煢煢沙雁影陽回未得入關飛

送左大來先生葬

重關不禁旅魂過夢裏看君渡塞河白日總悲生事少黃
泉翻羨故人多荒臺啼鳥圍松柏廢苑寒雲鎖薜蘿未遂
首邱須淺葬好留枯骨待恩波

洗馬橋王三俠君

靈崖北下莽蕭蕭舊是單于洗馬橋野槿帖山垂白葉番
河歸海逆紅潮共傳化日銷兵甲不厭寒星送使輶萬里
天書自西出吟鞭應歎斗牛遙

季振宜字詵兮號滄葦泰興人順治丁亥進士歷官御
史有靜思堂詩藁

詩話滄葦與兄天中先後官諫垣同以風節著詩才亦相伯仲其夢兄五言長篇語語真摯皆至性所流出滄葦風流好事藏書之富甲於海內虞山毛氏汲古閣宋板精鈔悉歸延陵乃未久轉入徐氏傳是樓聚散雲煙古今同慨

潼關有感

興亡非一代形勝覽層樓渭水千年濁秦山萬里秋豺狼互吞噬盜賊化王侯郵置無餘馬黃華不肯休

贈白門丁繼之

夜夜金陵夢所思君今猶是故棲枝杯傳燭影人如玉柳眉波光月似規白髮遺民翻舊譜烏衣年少唱新詩繁華搖落秋無限木老煙寒總不知

夜夢亡兄書寄柩前用代酹酒

曠野獸錚錚高山石嶸嶸金風吹淅淅白水流瀾瀾河廣

激長流流急岸崩圯見兄隔彼岸欲就乏舟艤遂有濟子
者亂流舟若駛呼兄兄呼弟相見甚相喜攜持各一手分
明見十指顏色非平生無復舊冠履契闊幾多年別離昨
日爾長跪問我兄胡爲瘦至此兄云汝不知我今長已矣
形骸關塞外日閉黃泉裏青藤纏木棺寒冰浸骨髓鄰寺
聆鐘鼓隔土藉荆杞天遠難踰越地老瞻岵岵朋友宿草
盡爺孃四千里耶喜精神健娘食無甘旨三妹又長逝白
髮將誰倚汝嫂目失光石英覓燕市從來敬寡嫂青鳥化
童子莫我兒饑寒我兒方生齒我聞淚雨下長跪不能起
我欲有所啟收淚復長跪白馬真死友弟曾無錢紙遶東
古戰場賢愚屍積委鬼强射虎儔兄弱雕蟲土一唱和者
稀筆硯雜弓矢燐火連破冢託足兄焉恃兄云汝不知夜

臺無曉理偷兒盜青氈魂憑烏皮几沽酒邀修文冉冉荒
煙水欲行我自行欲止我自止聖人復我官旅櫬歸桑梓
所遺七八口汝當速經紀寄語掌史官慎勿挂青史我聞
淚下兩長跪但唯唯唯唯更悽悽得毋我亦死

滄州古剎

齒齒魚鱗泊客船浮圖倒影水淵淵嘶風老馬斜陽裏茹
菜窮僧古佛前宦海於今非故我情田何處問諸天新聲
一夜江南笛落盡明霞月又圓

蔣超字虎臣自號華陽山人金壇人順治丁亥一甲三
名進士綬編修有綬庵集

詩話虎臣幼耽禪理相傳前生爲峨眉山僧年二十
三登第典試浙江猶未娶也後乞病歸徧游名山卒
於峨眉伏虎寺臨化有詩偶向鑊
中求避熱那從大海去翻身云云

文殊院

紫玉屏風敬佛筵諸峯如笏上青天偶來山寺空無主驚
起白猿松際眠

春日郊行有感

糝綠嫣紅郭外稠花開不待客登樓穗頭鶴髮黃扉客多
少青春是夢游

金陵舊院

錦繡歌殘翠黛塵樓臺已盡曲池湮荒園一種瓢兒菜獨
占秦淮舊日春

葉封字井叔黃州人順治丁亥進士歷官兵馬司指揮

康熙己未舉博學鴻詞選授工部主事有慕廬詩

詩話井叔先世嘉興王氏以父嗣於葉徙居武昌官
於楚遂著籍登科詞科不遇銓主事已先歿初令登

封游嵩山得詩數十篇漁洋爲序而刻之又採他詩與宋牧仲舉王幼華又旦曹六升貞吉顏修來光敏田綸霞雯丁干仞重輝丁雁水煒曹頌嘉禾汪蛟門懋麟並列爲十子由是名益起

贈別林蜚伯戶部

輓塵如海汎溟滓蜃氣樓臺眩光景芸芸朝暮轟誼罔不問公私詔鼃鼃九達車馬轆轤馳盛者炎炎衰者冷誰其擺脫縈攪絲解聽晨鐘夢魂憬異哉林子獨天挺身雖酬醉心自靜曩予彊持手版時竊怪閭迂太孤鯁逢君相視笑莫逆謂能潦倒樂與並狂吟往返讀且賡貰酒招尋醉還醒只應方柄成鉏鋤奚有疏觀枉見省言詩今數新城王顧謂兩生特清警一人知己古所難念此胸懷日耿耿比來俯仰分升沈依舊從容泯畦町俄傳布詔徵儒流謬叨同舉慚公等天庭揆藻曠代稀我本空疎君暇整無如

刺繡輪倚門何況撞鐘以寸莛半生夜墮智井中一瞬雲
過泰山頂嗟乎六憶勿復歌聊勝五窮竟靡騁浮湛卽署
猶避世擁腫支離直縣癭側聞陰盛則變常杞人之憂更
恹恹唱然歸去江湖邊願忍長飢決幽屏淡交屈指甯可
多會面爲期幾何頃鳳翔千仞鴻亦冥下眠枋榆亂榛梗
滔滔饒水委逝川落落吾儕終愛鼎

嵩陽書院簡耿逸菴

荒院重開地周廬益美輪吾衰期復古道在信傳人喬木
能無恙今居必有鄰回思經始日僅爾薤荆榛
虛堂遠塵累樂地幾朋來游息無非學文章亦見才經行
黃葉下取次碧筠栽佇想惟吾友清心絕點埃

初夏樂叢開公以詩見招屢期不果依韻酬簡

落花隨澗瀉紅泉濃樹和雲覆綠煙玉版可參惟一味粒
松能種合孤妍將偷閒日因過院見買清風不用錢惆悵
幽期頻自失勝情空憶古人賢

雨後立秋獨由寒谿循路聽泉至西山寺卽事呈開
公

愁霖及稍霽獨往聽流泉蓮漏寒谿外松風古閣邊有山
須磊砢無水不潺湲得石披襟坐澂懷一灑然

如此泉聲好能禁野興生空池收滴瀝危石漱琮琤逝者
從觀道清兮可濯纓幽期在林樾取次上頭行

散步逢秋蚤尋僧到上方因之開晝定喜爲煮泉嘗庭草
綠隨意巖花紅斷腸淙淙幽澗響盈耳沃清涼

攤書臨斷壑倚檻近斜曛爲愛鳴寒玉還因誦碧雲松濤

兼淅瀝花梵更續紛輪爾開朝暮經行坐卧聞

故興獻帝陵

在今安陸府城東本名松陵山嘉靖入繼大統封爲純德山尊曰顯陵

橋陵龍升空劍履穀林通樹非觀美驪山冢底鳬雁銷青
梧樹下麒麟委郢州城東純德山鬱鬱佳城餘廢壘寢殿
灰飛華表孤山渠泉澀朱門圯生爲藩王歿稱帝松柏無
煩向西靡祇憐拱木已盡摧猶幸前和未遭毀緬懷建文
與景皇手握乾符作天子易名莫獲及其身追王偏能尊
旣死當時議論爭短長事久終應定誰是吁嗟竹簡出人
世零落蟾蜍盛滴水一雙玉魚猶宛然三重銅棺亦徒爾
爲君難保不失勢帶劍上邱古如此遙瞻斜照十三陵尙
護閒雲暮山紫

天壽山陵有敕禁樵牧

愚山至得王昊廬侍讀寓書奉答

雖至名山似謫居
顧瞻清禁引華裾
陳情已遂無遺恨
載筆相傳有賜書
人立雲端高獨鶴
客來秋晚寄雙魚
風塵卻愧非仙骨
枉問丹砂歎久虛

來書稱嵩有出山鉛服餌可以長生覓之不得

洛水懷古

託怨靈妃賦感甄
多情玉枕暗傷神
莫嫌泣豆相煎急
蚤與君王作路人

任文華字聯璧號雲潭新鄉人順治丁亥進士官廣信推官有澤畔吟東園草繁霜吟清商詞

白露園

曲檻澄潭側泉聲曉夜聞
竹煙遮午日山色織秋雲
池靜留孤月人閒對片雲
滄洲原不遠可許與平分

李昌垣字長文宛平人順治丁亥進士厯官侍讀學士

瓜洲

新柳近危城晴波燕子輕潮聲環郭遠春色渡江明細草
煙中密高林雨後平疎籬臨曲岸小泊聽啼鶯

孫宗彝字孝則號虞橋高郵人順治丁亥進士歷官薊
州分巡道副使有愛日堂集

焦山

落潮泛舸未遑巡面面青山似故人殿閣當年懸日月海
天不夜識金銀有情草樹留書舍無限煙波待釣緡拂袖
直須臨絕頂容城古碣亦嶙峋

同曹秋岳先生遊韜光菴和高忠憲公韻

山水灼真意高深致有餘棟宇蟠天根恍躡洪濛初流泉
渟方池清風灑前除遂使冰雪心迴與塵世疎小住倦登

陟初地供軒渠簷楹闕江海一氣鏤清虛洞庭但浩養豈

是僊人居

上有純陽祠宇

嵐色幻今古螻蛄鳴春秋紛埃事徒滿所尙高王侯嶽嶽懷古人正氣誰與傳勁節在天壤不毀同山邱何來逸情叟舒卷千載憂杖履復舟楫逍遙繼尋幽好詩藏名山披讀起龍湫梧岡有鳳凰別浦浮野鷗名德礪公等終焉吾所求風雲薄巖壑悚焉不可留

張九徵字公選號湘曉丹徒人順治丁亥進士官河南

提學參議康熙己未舉博學鴻詞

詩話國初提學一職動招物議多被譴者湘曉在中州士林翕服最有聲譽子禮存翰編素存相國皆早年登第同居館職故湘曉未應大科之徵熟於明代掌故相國總裁明史頗資庭間漁洋稱其博物君子

詩中解人

鶴林寺

昨歲逢僧話竹樓重來驚見雪盈頭杜鵑花老人天夢黃
鶴山空禾黍秋壁破字隨風雨去珠還像借鬼神留夕陽
莫漫催歸騎涼月松風好夜游

己亥錢馭少移居丹陽

翛然一榻此青邱卧起三年只小樓山色愁看霜葉曉簫
聲空度鳳城秋武陵避世何知漢荆土依人不爲劉最喜
一星占處士丹陽郭是古南州

安南卽事

鐵騎昆明道戈船粵水西諸君催轉戰天意罷征鼙象飲
蠻江靖鳶飛浪泊低須知尺一詔不異下金雞

杜陝字子濂別字湄村濱州人順治丁亥進士歷官分

守開歸道參政有湄湖吟

詩話湄湖十一歲補弟子員蓋早慧而夙成者王貽上爲作墓誌稱其詩有奇氣類山陰徐渭陳伯璣撰國雅取以壓卷毛會侯言于鱗工於摹擬湄湖出於自然其風格有較勝者集係其子誠方刊行道光己丑其元孫

鶚重鐫

寒夜怨

陳草不可結樹寒枝相依蛾眉夜分明愁思不得歧漏遠
耳轉親月落心欲危孤衾光明滅照見雙鳳絲雙鳳何熠
熠羽毛立離離迴眸斂精魄悲來還自持寢興忽晝暖息
定意旋移殷勤結良夢爲寄心相知

宜陵道中

理柅風雨伺一楊百愁寄行役苦留連堅忍獨噓淚亂去
十餘年生聚尙童穉修垣成蕪叢稻畦變郵置況乃海東

頭官鹽屬有司煮鹽燒煙青蠅利翅可聚三歲潮不至儻
來何最屬直擣范公堤還鹵不毛地河魚等烹鮮田蠃亦
骨醉築堡備潮汐古人勞遠意大蛇趨其顛昂顛待人飢
臨窟氣欲腥攀崖指已墜死水與死蛇挺刃理勿二天地
莽嗟吁鬼神紛顛顛上河頗有秋翼翼禾垂穗淫淫凍雨
纏秋陽何時灑昔稱全盛日東南反者沸隋屠元感後攻
戰互終始繁華不在野災異恒滿誌荒疫踵干戈諒復關
人事把酒問蒼冥涕泗忽淹鼻

遊天童寺道經育王嶺觀舍利

古寺饒長煙隔嶺見莽蒼舍利傳阿育西晉蹟乃昉人言
一尺塔光明彌百丈寶峯聚楞伽空谷走魍魎利賓與大
權儼立森供養溪水皆西流湯湯絕塵埃天童似兒孫羣

峰作兒襁松杉如此屋更出羣峰上天荒破義興密公更
雄長妙音胡寂然使我失瞻仰風雨宿山房夜聞鐘磬響
忽洗百年愁琉璃見精爽皎月懸一輪林杪寄眞賞

閱瓜洲城登大觀樓望京口

大觀樓外俯嵯峨江靜魚龍晝寂寥北固鐘聲寒出寺南
徐草色綠隨潮天臨平渚疑虛敞人倚危欄欲動搖歎息
伊婁河上柳六朝煙雨至今朝

庚子季秋贈別顧甯人社兄之會稽

都門曾諾共之官恰比前人解后歡燕領數奇天壤少虎
頭癡絕古今難布帆送客情何極木榻留君計尙寬一束
閒關傳小宋禹陵消息去漫漫

平山懷古

隋宮舊址盡荒涼一代繁華怨夕陽
清夜綵春啼鳥寂紅顏黃土野原香
星樓涵日浮空碧御道連煙入望長
多少興亡成底事年年青草滿雷塘

馬鳴蕭字和鑾號子乾青縣人順治丁亥進士歷官工部員外郎有惕齋詩草

惕齋用東坡韻

四時無休歇過去那堪數二氣自升降
天地亦何語獨坐望雲煙波鳥時高舉
爲憐衰謝人白髮剩幾縷支離歎此身
短筇難爲拄况復人間世霜雪雜風雨
故園棗栗熟剝落動盈筥不定若飛蓬
飄歛及黃土隱几澹無營邱壑倘相許

野處逢歲稔延賞因時適君子不素餐
饘粥猶戰慄微尙

風有心粒食無陳乞肅穆耽松徑煙霞滿石室魂夢頗云
安肯教魚鳥逸俯仰易爲陳遑論處與出寥寥此天地語
笑或可必

劉璽字爾符朝邑人順治丁亥進士官烏程知縣有鍊
山集

秋日雜詩

讀書一萬卷不救蒼生窮借問昔所讀今與石田同露冷
蟬不語草吟亂百蟲時物自遷變君子憂忡忡何以緩斯
憂埋之酒杯中酒邊落清響不知是秋風醉詠松竹間蕭
灑開心胸

移居小白村

野居無事洛之干一杖逍遙任考槃青玉映筐挑馬齒紫

雲搖壁鬪雞冠客登秋閣生毛羽山向詩人露肺肝林靜
月明高喚酒又聽漁唱過前灘

市煙隔岸四鄰靜南北輪蹄路不通秋色老添黃雀兩雁
聲孤墮白蘋風少陵詩卷兀相向元亮酒壺誰與同猶喜
閒閒張仲在釣竿長伴荻花中

繆慧遠字子長吳縣人順治丁亥進士官壽陽知縣有
甯齋詩集

有感

湘水桃源欲問津衣冠處處哭秋旻甯同白馬殲朝士肯
爲黃巾赦黨人行澤楚臣應抱石上書梁獄幾全身驚心
南國添繒繳解網還邀聖主恩

烽煙海內尙兵塵奮袖論才得爾曹紫塞重彈白翎雀金

門競奏鬱輪袍蒼茫夢裏詢蕉鹿浮拍池中把酒螯長嘯
獨期千古事詠懷何必反離騷

憶遼左故人

生歸何地更逢君蘭忌當門自昔云東洛少年無賈誼制
科風漢獨劉蕡蕃釐種徙瓊花絕遼海魂啼杜宇聞篋裏
故人封事臺雨窗檢點淚紛紛

田茂遇字楫公號髴淵華亭人順治戊子舉人授新城
知縣不赴康熙己未舉博學鴻詞有水西草堂集

詩話髴淵少爲陳卧子所激賞後爲梓其遺集以報
之試鴻博不遇歸築水西草堂觴詠以老選當代名
人詩名十五國風又選高言
集清平詞詩有仇爽之氣

貧交行

古人不貧才不老今人貧乃傷懷抱古人結交重青雲今

人棄置同秋草今古人情何太殊我來仗劍邯鄲道邯鄲
城中游俠多邂逅相逢意氣好腰間脫劍且按歌尊中有
酒復傾倒上堂拜母下揖嫂與子縫裳復剝棗君不見古
來英雄不用爲傭保叩角行歌石皓皓

孤兒行

孤兒啼聲何淒然問汝啼何爲長跪答言父爲南海太守
居官清廉不枉取一錢鳴騶吹角大吏巡邊前導到部勢
喧然晨報謁不得前夕報謁不得前急從販繒者貰縑百
聯獻之幕府大不歡曰此邦舊有百斛珍珠船大吏朝去
境夕拜賤守此海邦另擇名賢烏白鷺黑上下茫然父羈
南海不得旋客死歸黃泉兒負嫠母跋涉山川乞食路間
望見大吏鳴騶吹角仍巡邊猗嗟父骨歸何年

李貺字君右號書城潛江人順治戊子舉人官丹徒知縣有含桃軒詩橐百城煙水集

答遐矚

四月江南花已殘卻回來伴子陵竿室營燕壘歸猶客夢渡江濤險似官長夏疎籬搖老綠短衣曲檻俯迴瀾此中著述渾閒事偏耐幽人冷眼看

魏學渠字子存號青城嘉善人順治戊子舉人由成都推官歷官江西湖西道康熙己未舉博學鴻詞有青城山人集

詩話青城爲忠節季子在官多惠政生平輕財好施與桐城錢飲光戚其惠有詩云還家擬建懷青閣從此飢驅不出門錢塘汪徵五以所贈築園江干名曰魏園餘姚黃晦木從求買山之助與黃金一餅謂於友朋間得未曾有

游祁氏寓園

卽忠愍
沈洲處

北望首陽巔黃雲愁欲暮南汭汨羅水清光渺難晤我行
陟寓山哲人想芳素岡巒互起伏蘭蕙紛無數亭榭鬱參
差夕霞橫古渡的的淥池荷飛飛汀洲鷺孤鳥西北來哀
鳴如有訴風雨眺高原慷慨登樓賦之子赴澄潭客徒悲
薤露山鬼披蘿立湘娥倚竹顧人生不百年喟然恍先露
贈葉聖野

廚顧今誰在相逢倍黯然西臺哭自慟東海蹈誰憐靡騁
悲天馬銜哀託杜鵑芙蓉照秋水還上釣魚船

燕臺感舊

宮闕岿巍夕照開登臨是處重徘徊一行雁影南天落萬
里龍媒北極來芳草萋迷埋石鼓寒風蕭瑟上金臺因逢

燕市悲歌客貰酒還聽畫角哀

魏允枚字卜臣號功父嘉善人順治戊子舉人

寄六弟

作客頻年慣今偏憶故鄉老親能恤緯稚子解扶牀夢入
清宵短雲看白晝長愁心逐江水日夜下潯陽

淮上送人歸睦州

野渡青青楊柳新自憐爲客久風塵送君遠向嚴陵去七
里濤聲落富春

王永命字九如號劬菴臨汾人順治戊子舉人官遷安

知縣擢行人有有懷堂筆松韻堂筆邊工漫記

詩話劬菴生有至性親喪哀毀盡禮著蓼莪操
少從其鄉先生桑暉升游學有根柢不以詩名

和覺老菊花韻

不寄籬邊不繫闌遠移香氣雨花寒秋深此日題知己淡
淡煙姿醉裏看

焦賁亨字汝將登封人順治戊子舉人官瑞州同知

觀盧巖瀑布放歌

峯回絕壁鬼斧折鑿破天門天漢泄千崖照耀挂長虹飛
流濺沫噴寒雪須臾幽壑風颯颯吹散游絲四面射我欲
翦之作羅裙鮫人停梭依嵐泣危磴斑斑繡紫黛躡屐捫
蘿石龕在洞花搖落點翠林懸巖顛松皆生態隱隱谷口
處土莊盈盈碧水洗石牀載酒酣歌興未已玉女峯頭月
吐芒

趙三麒字乾符武鄉人順治戊子舉人官泰州同知有

似園集

詩話乾符詩蘊釀深醇自饒唐韻爲漁洋所稱許官
泰州同知漁洋在廣陵嘗詫客曰吾衡官屈宋矣

夜坐有作

明燈倦修夜清言誰與晤虛牖響悲風寒月出高樹淒淒
四野鴻矯矯雲中鶩歲月漫遷徂此生却虛度歸養計未
成徒倚傷遲暮

聽琴

涼風宜晚集燈火夜堂沉吳客鼓蘭操臨風寫意深露桐
應下葉秋鶴欲投岑此調久淪寂聞之開素襟

衡山

嵯峨南盡楚江天七十餘峯路幾千銅柱挂雲堆漢表祝
融看日起山巔金書玉簡從誰得石鼓朱陵不似前極目
衡陽千萬水每聞鴻雁一悽然

毛蕃字穉賓嘉善人順治戊子副貢

魏交讓曰穉賓詩如陳王會圖航海梯山畢致珍異又如龍宮寶藏不可測識卽廊廡間物無非結緣懸

鏡聽詞

匣中古鏡青銅蝕持向竈前重拂拭歛衣載拜前致詞夫
壻一別無消息古鏡千年會有神重問歸期眞未眞山川
險阻虎豹聚丁甯細向鏡中訴拜罷回頭竊自傷繡帶菱
花什襲藏他時夫壻重相見更與摩挲祠竈王

關山月

紫塞秋風勁黃榆玉露寒可憐今夜月還在異鄉看畫角
聲偏慘刀環夢已闌城頭回首望衰草白漫漫

多宏安字君修號畏庵阜城人拔貢歷官江西布政使

石湖

暇日躡雙屐探幽到水濱
風光梳岸草鶯語醉游人
棹破一天水花明萬樹春
湖山霽佐理邱壑見經綸

晚晴移詩匯卷二十四終